

**Iluarsiissut
Isumaliutissiissut 21. oktober 2022-meersoq taarserlugu
(atsiorneq ilanngunneqarpoq)**

**Tusagassiorfinnut tapiissuteqartarneq pillugu Inatsisartut inatsisaata
allanngortinnissaa pillugu Inatsisartut inatsisaattut siunnersuut
*Ilinniartitaanermut, Kultureqarnermut, Timersornermut Ilageeqarnermullu
Naalakkersuisumit saqqummiunneqartoq***

pillugu

**Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliap
siunnersuutit aappassaaneerneqarnerannut**

ISUMALIUTISSIISUTAA

Ataatsimiititaliap suliarinninnermini ilaasortarai:

Inatsisartunut ilaasortaq Doris J. Jensen, Siumut, siulittaasoq
 Inatsisartunut ilaasortaq Nivi Olsen, Demokraatit, siulittaasup tullia
 Inatsisartunut ilaasortaq Mala Høy Kúko, Siumut
 Inatsisartunut ilaasortaq Mariia Simonsen, Inuit Ataqatigiit
 Inatsisartunut ilaasortaq Egaluk Høegh, Inuit Ataqatigiit

UKA2022-mi ulloq 29. september 2022 siullermeerinninnerup kingorna ataatsimiititaliap siunnersuut misissorpaa.

Siunnersuutit imarisaat siunertaallu

Tusagassiorfinnut tapiissuteqartarneq pillugu inatsisip allanngortinnissaanut matumani siunnersummi suliniutinut tapiissutit pillugit malittarisassat atorunnaarsinneqarnissaat ujartorneqarpoq. Taamaalilluni ingerlatsinermut tapiissutit pillugit malittarisassat kisimik tusagassiorfinnut tapiissuteqartarneq pillugu inatsimmiilissapput. Suliniutinut tapiissuteqartarneq januarimi 2017-imili atuutilerneraniit qinnuteqarfingineqarnikuunnginnersa aningaasaliisoqarnikuunnginneraluunniit peqqutaalluni tamanna siunnersuutigineqarpoq. Taamaattumillu tapiissuteqartarneq siunertaasumut naapertuitinngitsoq isumaqarfingineqarluni.

Siunnersuutip Inatsisartuni siullermeerneqarnera

Siunnersuut siullermeerinninnermi taperserneqarluarpoq. Tusagassiorfiit pitsaassusaannik ineriartortuarnissaannillu qulakkeerinninnissamik kissaateqartoqartoq oqallinnermi

saqqummerpoq. Tusagassiorfinnut tapersersuinerup nalilersorneqarneratigut taamatut ineriartitsinissaq qulakkeerneqarsinnaasoq oqallinnerup takutippaa.

Tusarniaanermut akissutit

Siunnersuut piffissami 15. martsimuit 22. april 2022 tungaanut tusarniaassutigineqarsimasoq Naalakkersuisunit paasissutissiissutigineqarpoq. Tusarniaanermut akissutit tunniunneqarsimasut inatsisisstatut siunnersummut kakkiunneqarlutik, tamanna Inatsisartut Siulittaasoqarfiata ilusiliinissamut piumasaqaataanut naapertuuppoq.

Ataatsimiititaliap siunnersummik suliarinninera

Tassunga atatillugu tusarniummut akissummik takkuttoqarsimasoq ataatsimiititaliamit maluginiarneqarpoq, tassani nalilerneqarsimalluni suliniutinut tapiissutit pillugit malittarisassat atorunnaarsinneqassappata tusagassiorfinnut tapiissutit aningaasanut inatsimmi 2023-mi annikinnerulissasut. Suliniutinut tapiissutit aningaasartai tunniunneqarsimanngitsut ingerlatsinermut tapiissutit pillugit konto pingaarnermut nuunneqartarneri periusaanikuunera tamatumunnga peqputaavoq. Tusagassiuutit taamaalillutik suliniutinut aningaasaliissutissanik atunngitsuukkanik ingerlatsinermut pissarsisinnaasarsimapput. Inatsimmut allannguut 2023-mut atuutilissappat suliniutinut tapiissutinut konto pingaarneq atorunnaarsinneqassaaq, suliniutinut aningaasaliissutissat atunngitsuukkat ingerlatsinermut tapiissutissanut nuunneqassanngillat taamaalillunilu tusagassiorfinnut tapiissutit katillugit annikinnerulissallutik.

Siunnersuutip Inatsisartuni taperserneqarluarnera ataatsimiititaliamit maluginiarneqarpoq, siullermeirinninnermilu oqaaseqaatigineqartut nunatsinni tusagassiorfiit tusagassiuuteqarnerillu tapersorsorneqarnissaata pingaaruteqassusaanut tunngassuteqarnerusut. Taamaaliornikkut tusagassiorfiit nutaarsiassaqtitsinerisa pitsaassusaannik arlaannaannullu attuumassuteqannginnissaannik qulakkeerininniarluni. Tusagassiorfeqarnerup, ingammik tusagassiorfinnut tapiissuteqartarnerup allannguuteqarfigineqarnissaa partiinit kissaatigineqarpoq, tamatumanilu isumaqatigiissummik pitsaanerusumik angusaqartoqarnissaa eqqarsaatigalugu nutaaliortumik eqqarsaateqartoqassasoq.

Tusagassiorfiit kiffaanngissuseqartut tusagassiuuteqarnerullu kiffaanngissuseqartup tapersorsorneqarnissaat ataatsimiititaliamit pingartinneqarpoq, taakkummatami kikkut tamat oqartussaaqataanerannik tunngaviliisuusut. Tusagassiorfiit oqaloqatigiinnernik pilersitsisinnaanerisa pingaaruteqassusaat ataatsimiititaliamit tikkuussiffigineqarpoq. Oqaloqatigiinneq inuiaqatigiinnut paasissutissiisusoq taamaaliornikkullu kikkut tamat oqartussaaqataanerannik nukittorsaasusoq. Tusagassiorfiit tamanna angusinnaavaat aatsaat pitsaassuseq eqqortoq nukissallu eqqortut pigunukkit.

Taamaattumik tusagassiuutit pitsaassusaannik soqtiginassusaannillu qulakkeerininniarluni

tusagassiuutinut tapersersuineq nalilersorneqartariaqartoq ataatsimiititaliamit maluginiarneqarpoq. Taamatut nalilersuinermi tulliuttutigut allaqqasut ukkatarineqartariaqarput: Sineriak tamakkerlugu sumiiffimmi nutaarsiassat qulakkeerneqarnissaat, nunatsinni tusagassiorfiit tusagassiuuteqarnerullu ineriartortuarnissaannik tusagassiorfinnut tapiissuteqartarnermit qulakkeerneqarnersoq, tusagassiorfinnut tapiissuteqartarneq tusagassiorfinnut namminersortunut pitsaanerpaamik atugassaqartitsinersoq, kiisalu §16, 7 naapertorlugu tapiissutinik pissarsinissamut piumasaqaataasut ullutsinnut naleqqunnersut. Tusagassiorfiit pillugit nalunaarusiaq 2010-mi suliarineqartoq assigalugu nalilersuineq ilusilersorneqarsinnaavoq.

Siunnersuutip aningaasatigut kingunerisassai

Siunnersuut piviusunngortinnejarpal aningaasatigut kingunerisassai siunnersummi nalinginnaasumik oqaaseqaataani nassuiarneqarput. Tassani ima allaqqavoq siunnersuut aningaasatigut allaffissornikkulluunniit pisortanut kinguneqarnavianngitsoq.

Ataatsimiititaliap inassuteqaatai

- Ataatsimiititaliap isumaqtigiittup siunnersuut akuerisassanngortippaa.
- Ataatsimiititaliap isumaqtigiittup Naalakkersuisunut kaammattuutigaa:
 - Tusagassiorfiit pillugit nalunaarusiaq 2010-mi suliarineqartoq assigalugu suliaqartoqassasoq kingusinnerpaamik 2023-mi ukiaanerani ataatsimiinnissamut naammassereerneqartussamik

Taama oqaaseqarluni isumaliutissiisummilu allassimasunut paasinnilluni ataatsimiititaliap siunnersuut aappassaaniigassanngortippaa.

Doris Jakobsen Jensen
Siulittaasoq

Nivi Olsen
Siulittaasup tullia

Eqaluk Høegh

Mala Høy Kuko

Mariia Simonsen